

तिमोथीयात पावलं च्वःगु न्हापांगु पौ म्हसीका

थ्व पौ पावलं माकेडोनियां तिमोथीयात च्वःगु खः। पावलं थःगु निक्वः खुसिया यात्राया इलय् वयात नापलाःगु खः। तिमोथी एशियाय् लाःगु लुस्त्रा शहरय् च्वंम्ह छम्ह ल्याय्म्हम्ह विश्वासी खः। वया मां यहूदी व बौ ग्रीक खः। पावलयात वयागु ज्याय् वं ग्वाहालि ब्यूगु खः। थ्व पौलय् स्वता खँयात बांलाक ध्वाथुइकातःगु दु।

दकलय् न्हापां पावलं मण्डलीइ मखुगु खँ स्यनाजुइपिनिपाखें बचय् जुयाच्चनेगु ख्याच्चः बियातःगु दु। इमिगु धापू कथं संसार मभिं, गुप्तिखँयापाखें जक मुक्ति काये फइ, अले ब्याहा मयासें व नये मज्यू धयातःगु नसा मनसे जक हे काये फइ। थ्व पौया निगुगु ब्वय् पावलं मण्डली गुकथं चले यायेगु, गुकथं सेवा यायेगु व मण्डलीया थकालिपि व ग्वाहालि याइपिनिगु चालचलन गज्याःगु जुइमाः धकाः नं न्ह्यथनातःगु दु। दक्वसिबय् लिपा पावलं तिमोथीयात येशू ख्रीष्टया धार्थेम्ह च्यः गुकथं जुइगु व मण्डलीया थकालिपि व क्वकालिपि विश्वासीतय्त गुकथं हनाबना तयेमाः धकाः अतीं बियातःगु दु।

धलः पौ

न्ह्यखँ १:१-२

मण्डलीया थकालिपि व ग्वाहालि याइपिनिगु खँ १:३-३:१६

भाःत मदय् धुंकूपि मिसातयगु खँ ५:१-१६

धिबायागु लोभ मयायेगु बारे अतीं ६:१-१०

मेमेगु अतीं ६:११-२१

१ तिमोथी

पावलपाखें ज्वजलपा

1 मुक्ति बियादीम्ह परमेश्वरया उजंकथं आशा बियादीम्ह येशू ख्रीष्टया प्रेरित जुयाम्ह जि पावलयापाखें

2 विश्वासय् जिम्ह काय् थें जुयाच्चंम्ह तिमोथीयात* ज्वजलपा।

* 1:2 १:२ तिमोथी ग्रीक भाषां तिमोथियस

परमेश्वर बाः व झी प्रभु येशू ख्रीष्टयापाखें छन्त दया माया व शान्ति दयेमा।✧

मखुगु खँ स्यनीपि लिसे होश या

3 जि माकेडोनियाय वने तयनाबलय् छन्त एफिससय् हे च्वँ धकाः धयागु खः। मखुगु खँ स्यनिपिन्त पनेत छ अज्ज नं अन हे च्वनाच्वँ।

4 जिं धया थें इमित मनय् वः थें बाखं कनेगु व तापाःबाज्यापिनिगु धक्कु त्वःतेगु ज्या याके मते। थुकिं विश्वास यानाः जक थुइगु परमेश्वरयागु ग्वसाःयात स्वयाः अप्वः जवाःसवाः यायेगुयात तिबः बी।

5 यचुगु नुगलं, भिंगु मतिं व शंका मयासें याइगु विश्वासं दइगु मायायात ब्वलंकेत जिमिसं थथे धयाच्वनागु खः।

6 गुलिखय् मनूत ला थज्याःगुपाखे लिचिलाः म्वाःमदुगु खँय् जुयाच्वंगु नं दु।

7 थःपिन्सं छु धयाच्वना धकाः इमिसं मस्य्, न इमिसं थःगु खँयात विश्वास यानाः हे धायेफु। अयनं इपिं व्यवस्था स्यनीपिं गुरु जुइ मास्ति वः।

8 व्यवस्थाय् च्वया तः थें याये फःसा व्यवस्था तसकं बांलाःगु खः धकाः झीसं स्यु।

9 व्यवस्था भिपिं मनूतयगु नितिं दय्कातःगु मखु। थ्व ला मभिपिं मनूतयगु नितिं दय्कातःगु खः। नियम मानय् मयाइपिं, परमेश्वरयात मानय् मयाइपिं, पापीत, पवित्र मजूपिं, परमेश्वरयात क्वह्यंकीपिं, मां बौयात स्याइपिं, मनु स्याइपिं,

10 व्यभिचार यानाजुइपिं, मिजं मिजं हे व्यभिचार यानाजुइपिं, दास मीपिं, मखुगु खँ ल्हानाजुइपिं, मखुगु साक्षी बीपिं व भिंगु खँयागु अःखतं ज्या यानाजुइपिनिगु नितिं दय्कातःगु खः।

11 थ्व हे तसकं भिंगु खँ दकलय् तःधंम्ह परमेश्वरं जितः न्यकेत बियादीगु खः।

परमेश्वरया दयाया नितिं सुभाय्

12 जिगु ज्याय् जितः शक्ति बियादीम्ह झी प्रभु येशू ख्रीष्टयात जिं सुभाय् बी, छायाःसा वय्कलं जितः विश्वास यानाः थःगु ज्या याकेबियादिल।

13 न्हापा जिं प्रभुयात विश्वास मयानानिबलय् निन्दा यायेगु, वय्कःयात विश्वास याइपिन्त लिइगु व वय्कःयात क्वह्यंका जुइगु याना, तर जिं थुपिं मसीकं व अविश्वासय् यानागुलि परमेश्वरं जितः दया यानादिल।✧

14 ख्रीष्ट येशूयात यानागु विश्वास व मायां यानाः वय्कलं जितः तसकं दया यानादिल।

15 पापीतयत् मुक्ति बीत ख्रीष्ट येशू थ्व संसारय् झायादीगु धात्थे हे खः धयागु खँ फुक्कसिनं मानय् याये हे माः। पापीत मध्ये नं जि तसकं पापीम्ह खः।

16 थुकिं यानाः हे वय्कलं जितः माया यानादिल। जि थें ज्याःम्ह तसकं पापीयात थःगु धैर्यं क्यनेत वय्कलं जितः नमूना दय्कादिल। थ्व नमूना लिपा वय्कःयात विश्वास याइपिं व अनन्त जीवन काइपिनिगु निरिति खः।

17 न्ह्याबलें दयाचवनीम्ह जुजु, गुबलें सी मखुम्ह, खने मदुम्ह छम्ह हे जक परमेश्वर न्ह्याबलें तःधनेमा अले वय्कःयात हे फुक्कसिनं हनेमा। आमैन।

18 तिमोथी, जिकाय, छन्त कयाः न्हापांनिसें जुयाचवंगु अगमवाणी कथं जिं उजं बियाचवना। थुकियात हे ल्वाभः यानाः छ प्रभुया निरिति ल्वाना च्वँ।

19 विश्वास यायेगु व भिंगु खँ मतिइ तयेगु त्वःते मते। मति मभिना वंगुलि ग्वःमहयसिनं ला विश्वास यायेगुनापं त्वःते धुंकल।

20 अथे स्यंपिं मध्ये हुमेनियस व अलेक्जेन्डर नं खः। अज्ज अप्वः थुमिसं प्रभुयात बांमलाकाः खँ ल्हाना मजुइमा धकाः जिं थुमित शैतानयागु ल्हातय् लःल्हानाबी धुन।

2

मण्डलीइ यायेगु सेवा

1 अयजूगुलि दक्वसिबय् न्हापां मण्डलीयापिन्त जिं धाये – फुक्क मन्तयगु निरिति प्रार्थना व बिनित्ति यायेगु व सुभाय् बीगु या।

2 शान्ति व चितासू दय्कः म्वानाचवने फयेमा, अले परमेश्वरयागु सेवा दुग्यंक याये फयेमा धकाः जुजुपिनिगु निरिति व अधिकार दुपिनिगु निरिति नं प्रार्थना या।

3 झीत मुक्ति बियादीम्ह परमेश्वरयात थथे याइगु यः। अले थ्व भिंगु ज्या नं खः।

4 फुक्क मन्तयसं मुक्ति काये फयेमा व सत्यगु खँयात बांलाक सीकाकाये फयेमा धयागु वय्कःया इच्छा खः।

5 परमेश्वर छम्ह हे जक दु। अले दथुइ चवनाः मन्तयत् व परमेश्वरयात मिलय् यानादीम्ह नं छम्ह हे जक दु। थथे मिलय् यानादीम्ह मनु ख्रीष्ट येशू खः।

6 वय्कः फुक्क मन्तयगु पलेसाय् सिनादिल। न्हापांनिसें हे क्वःछिना तःकथं वय्कः पाय्छि इलय् सिनादिल।

7 थ्व हे ज्या यायेत जितः भिंगु खँ न्यंकः जुइम्ह व प्रेरित यानादिल। जिं धात्थेंगु खँ धयाच्चवनागु खः, मखुगु खँ ल्हानागु मखु। यहदीमखुपिन्त थ्व हे धात्थेंगु खँ कनाः विश्वास याकेत जितः गुरु ल्ययातःगु खः।✧

8 मिजंतय्सं न्हाथाय् नं तं मचासे व जवाःसवाः मयासें दुनुगलंनिसें पवित्र ल्हाः ल्हनाः प्रार्थना यायेमाः।

9 अथे हे मिसातय्सं ल्वय्कः सादा वसतं पुना जुइमा। तःजिगु तिसा, वसः पुनाः अप्वः समाः याना जुइ मते।✧

10 परमेश्वरयात मानय् याइपिं मिसातय्सं थःत ल्वय्क भिंगु ज्या याना जुइमाः।

11 स्यनेकने यायेथाय् मिसातय्सं सुम्क च्वनाः सय्काकायेमाः, अले धाःथें च्वनेमाः।

12 मिसातय्सं मिजंतयत् क्वत्यला तयेगु व स्यनेकने यायेगु ज्या जिं याकेबी मखु। मिसातय्सं सुम्क च्वनेगु यायेमाः

13 छायाःसा दकलय् न्हापालाक आदमयात सृष्टि यानादीगु खः। अले लिपातिनि हव्वायात सृष्टि यानादीगु खः।✧

14 आदमयात मिखाय् धुलं छ्वाकूगु मखु, बरु हव्वायात मिखाय् धुलं छ्वाकाः वयापाखें हे पाप याकूगु खः।✧

15 अयत्नं मिसातय्सं क्वान्तुक विश्वास व माया यानाः पवित्र जुयाच्चन धाःसा मचा बुइकीबलय् इपिं कष्टं बचय् जुइ।

3

मण्डलीया बिशप व ग्वाहालि याइपिं

1 थथे धयातःगु धात्थें हे खः – सुनानं मण्डलीया बिशप जुइ मास्ति वय्कूसा, वं तसकं बांलाःगु इच्छा यात।

2 बिशप जुइम्ह मनू छुं हे दोष मदुम्ह, छम्ह हे जक मिसालिसे ब्याहा याःम्ह, थातं च्वने फुम्ह, थःत थःम्हं कःघाये फुम्ह, चालचलन बांलाःम्ह, पाहां वःपिन्त दुनुगलंनिसें दुकाइम्ह, बांलाक स्यनेकने याये फुम्ह,

3 अय्लाखं कायका मजुइम्ह, ल्वाना मजुइम्ह, भिंम्ह, हाला जुइ मखुम्ह, धिबायागु लोभ मदुम्ह,

4 थःगु छें बांलाक कःघाये फुम्ह, थः मस्तयत् कजय् यानातये फुम्ह जुइमाः।

5 छायाःसा थःगु छँ हे बांलाक कःघाये मफुम्हयसिनं गय् यानाः मण्डली कःघाइ?

6 थज्याःम्ह मनू नकतिनि जक विश्वास याःम्ह नं जुइ मज्यू। मखुसा व नं अप्वः तःधंछुयाः शैतान थें नाश जुयावनी।

7 अले मण्डलीं पिने नं नांजाःम्ह जुइमाः, अथे जूसा जक वयात मनूतयसं हेबाय्चबाय् याइ मखु, अले शैतानयागु जालय नं लाइ मखु।☆

8 ग्वाहालि याइपिं नं अथे हे भिपिं व दुग्यंपिं जुइमाः। इपिं निता खँ मल्हाइपिं, अय्लाखं काय्का जुइ मखुपिं, अले धिबायागु लोभ मयाइपिं जुइमाः।

9 इपिं विश्वासायागु सत्य खँयात मननिसें बांलाक थुइका काये फुपिं जुइमाः।

10 बांलाक जाँचय् याये धुंकाः तिनि इमित मण्डलीं ग्वाहालि याकेबीमाः।

11 इमि कलाः नं अथे हे भिपिं, दुग्यंपिं, मेपिन्त हेबाय्चबाय् याना मजुइपिं, थातं च्वने फुपिं व न्ह्यागु खँय् नं विश्वास यायेबहःपिं जुइमाः।

12 थथे ग्वाहालि याइम्ह नं छम्ह हे मिसालिसे ब्याहा याःम्ह जुइमाः। अले व नं थः मस्तयत् कजय् याये फुम्ह व छँ कःघाये फुम्ह जुइमाः।

13 बांलाक ज्या याइम्हयसित फुक्कसिनं मानय् याइ। अले इमिसं येशू ख्रीष्टयात थःम्हं विश्वास यानागु खँ मेपिन्त नं मग्यासे धाये फइ।

तःधंगु गुप्ति खँ

14 थ्व पौ च्वया च्वनाबलय नं जिं याकनं हे छन्थाय् वयेगु मतिइ तयागु दु।

15 अयनं छुं जुयाः जि वये लिबात धाःसा परमेश्वरयागु छँय् झीसं गय् यानाः च्वनेमाः धकाः थ्व हे पौपाखें सीकाति। परमेश्वरयागु छँ धयागु हे मण्डली खः। अले थ्व सत्ययागु थां व किल्ला नं खः।

16 थ्व तसकं तःधंगु गुप्ति खँ खः धकाः झीसं स्यू –

वय्कः झी थें मनू जुयाः झाल,

आत्मायापाखें वय्कः धर्मी ठहरय् जुल।

स्वर्गदूततयसं वय्कःयात खंकल,

जात जातियापिन्त वय्कःयागु खँ न्यंकल,

संसारय् च्वंपिन्सं वय्कःयात विश्वास यात,

अले वय्कःयात तःधंकाः स्वर्गय् तुं थत यंकल।

4

मखुगु खँ कनीपिं खनाः होश या

1 लिपा लिपा मन्तयसं विश्वास यायेगु त्वःताः मखुगु खँ न्यनाः शैतानं धाःथे याना जुइ धकाः पवित्र आत्मां बांलाक थुइकाब्यूगु दु।

2 धर्मयागु ख्वाःपालं पुयाः मखुगु खँ ल्हाना जुइपिन्सं थथे याना जुइ। थुमिगु मतिइ मिइ छुयातःगु नैयागु नालुं पुकातये धुकल।

3 थुमिसं ब्याहा याये मज्यू गुलि गुलि नसा नये मज्यू धकाः मन्तयत स्यना जुइ। विश्वास याइपिं व सत्ययात थूपिन्सं सुभाय् बियाः न्ह्यागुं नये ज्यू छाय्धाःसा थ्व फुक्कं परमेश्वरं हे दय्कादीगु खः।

4 वय्कलं दय्कादीगु मभिगु छुं नं मदु। उकिं वय्कःयात सुभाय् बियाः न्ह्यागुं नये ज्यू।

5 छाय्धाःसा वय्कःयागु वचन व प्रार्थनां फुक्कं शुद्ध जुइ।

येशू ख्रीष्टया भिंम्ह च्यः

6 फुक्क दाजुकिजापिन्त थ्व खँ थुइकाबिल धाःसा छ येशू ख्रीष्टया भिंम्ह च्यः जुइ। अले थुकिं हे विश्वासयागु वचन व छं मानय् यानाच्चवंगु खँय् छ गुलि तक बल्लानाच्चवंगु दु धकाः सी दइ।

7 म्वाःमदुगु मनय् वः थें बाखं कनाजुइपिपाखें तापाक हे च्वँ। बरु परमेश्वरयात यय्क जक जुयाच्वँ।

8 म्हयागु ज्याखँ यानाः कम हे जक ज्यालगय् जुइ। आत्मायागु ज्याखँ धाःसा आः व लिपा तकं ज्यालगय् जुयाच्चनी।

9 थ्व खँ धात्थेगु व विश्वास याये बहःगु खः।

10 अयजूगुलि हे झीसं म्वाःम्ह परमेश्वरयाके आशा यानाः थथे दुःखकष्ट सियाः ज्या यानाच्चनागु खः। फुक्क मन्तयत मुक्ति बीम्ह, अप्वः यानाः वय्कःयात विश्वास याःपिन्त मुक्ति बीम्ह थ्व हे परमेश्वर खः।

11 थ्व हे खँ छं स्यनेकने या।

12 सुनानं छंगु ल्याय्म्हसूयात हेबाय्चबाय् याये मफयेमा, बरु छं खं, चालचलनं, मायां, विश्वासं व शुद्ध जुयाः इमि न्ह्यःने नमूना जुयाः कयँ।

13 जि मवतले मन्तयत धर्मशास्त्रं ब्वनेगु, स्यनेगु व न्वायेगु याना च्वँ।

14 थकालिपिन्सं छन्त छेनय् ल्हाः तयाः न्हापां हे क्वःछिनातःगु वरदानयात सिर्तिं छवये मते।

- 15 दुनुगलानिसें छं थ्व ज्या बांलाक याना च्वाँ। अले छंगु ज्या मेपिन्सं नं खनी।
 16 थःगु खँय् व थःम्हं स्यनागु खँय् बांलाक बिचाः या। थथे याःसा छन्त नं छंगु
 खँ न्यपिन्त नं मुक्ति दइ।

5

भाःत मदय् धुंकूपि मिसात, थकालित व दासतय्गु बारे सल्लाह

- 1 थः स्वयाः थकालिपिन्त ब्वःबी मते। इमित छुं धाये माःसा थः बौयात थें धा।
 थः स्वयाः क्वकालिपिन्त किजापिन्त थें व्यवहार या।
 2 अथे हे थकालिपिं मिसातय्त् मांपिन्त थें अले क्वकालिपिं मिसातय्त् मनय्
 पाप मतसे केहेपिन्त थें व्यवहार या।
 3 हाःनाः मदुपिं भाःत मदय् धुंकूपि मिसातयत् हनाबना तयेगु या।
 4 काय्म्ह्वाय्पिं व छय्पिं दुम्ह भाःत मदय् धुंकूपि मिसातय्गु सुसाःकुसाः वया
 काय्म्ह्वाय्पिं व छय्पिन्त हे याकेब्यु। इमिसं थःगु छँय् निं धर्म याये सयके ब्यु, अले
 मांबौयागु त्यासा पुले ब्यु, छायाधाःसा परमेश्वर थज्याःगु ज्यां लय्तायादी।
 5 हाःनाः मदुम्ह भाःत मदय् धुंकूपि मिसां परमेश्वरयाके भरोसा तयाच्चनी। अले
 चां न्हि परमेश्वरयात प्रार्थना यानाच्चनी।
 6 भाःत मदय् धुंकूपि मिसां यःयःथें सनाः मोजमज्जा याना जुल धाःसा व सीगु
 ति हे ग्यनी।
 7 अज्याःपिं मिसातयत् दोष मदय्क जुइ फयेमा धकाः थ्व खँ स्यनेकने या।
 8 सुनां थःथितियागु, अज्ज ला थः हे जहानपिनिगु तकं सुसाःकुसाः याइ मखु,
 वयागु विश्वास सिति वंगु ति ग्यनी। अज्याःपिं मनूत विश्वास मयाःपिं स्वयाः नं
 मभिपिं जुइ।
 9 छम्ह जक मिजंनाप ब्याहा याःम्ह, खुइदँ दये धुंकूम्ह भाःत मदय् धुंकूपि
 मिसायात।
 10 बांलाःगु ज्या यानाः नांजाःम्ह, मस्तयत् ब्वलंकूम्ह, पाहांतयत् दुनुगलानिसें
 दुकाइम्ह, परमेश्वरया मनूतयत् तुति सिलाः सेवा याइम्ह, हाःनाः मदुपिन्त ग्वाहालि
 याइम्ह व भिंगु ज्याय् जक मन तयाः जुइम्ह जूसा वयात भाःत मदय् धुंकूपि मिसातय्गु
 नांया धलखय् दुथ्याकसां ज्यु।
 11 भाःत मदय् धुंकूपि ल्यासेपिं मिसातय्गु नां धाःसा धलखय् दुथ्याके मते,
 छायाधाःसा इमिसं खीष्टयागु ज्या त्वःताः हानं ब्याहा यायेत स्वइ।
 12 थथे इमिसं न्हापा चिनातःगु बाचा ल्वःमंकूगुलिं इपिं दोषी ठहरय् जुइ।

13 अज्ज ला इपिं छैय् छैय् चाःहिलाः ज्या मयासें जुइ। थुलि जक मखु, इपिं खँगुलु जुइ, अले इमिसं मेपिनिगु ज्याय् ल्हाः तया जुइगु व ल्हाय् मज्ज्यूगु खँनापं ल्हाना जुइ।

14 अय्जूगुलि भाःत मदय् धुंकूपिं ल्यासेपिं मिसातय्सं ब्याहा यायेगु हे भिं जू। थुपिं मचाखाचा दयकाः छै बांलाक कःघाना च्वनीपिं जुइमाः। अथे जूसा इी शत्रुतय्सं नं धायेथाय् दइ मखु।

15 गुम्हं गुम्हं भाःत मदय् धुंकूपिं मिसात ला अथे बांमलाक सना जुयाः शैतानयागु ल्हातय् लाः वने नं धुंकल।

16 सुं विश्वासी मिसायाथाय् थथे भाःत मदय् धुंकूपिं मिसात दुसा वं हे इमित स्वयेमाः। थथे याःसा मण्डलीयात थाकुइ मखु। अले जक मण्डलीं भाःत मदय् धुंकूपिं हाःनाः मदुपिं मिसातयत् बांलाक ग्वाहालि याये फइ।

थकालिपिन्सं यायेमाःगु ज्या

17 बांलाक ज्या याःपिं थकालिपिन्त अप्वः हनाबना तयेमाः। अज्ज ला वचन न्यंकीपिं व स्यनिपिन्त अप्वः हनाबना तयेमाः।

18 धर्मशास्त्रय् नं थथे धयातःगु दु – “दाइ यायेबलय् द्रुहंयागु म्हतुइ पिचा तयाबी मते।” अले “ज्या याःमहयसित ज्यालाबी हे माः।”☆

19 निम्ह स्वम्ह साक्षी मदय्कं सुनानं थकालियात द्रुपं बिल धाःसां पत्याः याये मते।☆

20 पाप याइपिन्त फुक्कसिया न्ह्यःने हे ब्वःब्यु। थथे याःसा जक मेपिं नं गयाइ।

21 परमेश्वर, ख्रीष्ट येशू व ल्ययातःपिं स्वर्गदूततयगु न्ह्यःने जिं छन्त थ्व खँ धयाच्वना। थथे ज्या यायेबलय् सुयागुं पँली मते, अले सुयागुं ख्वाः स्वये मते।

22 हथाय् चायाः सुयातं छेनय् ल्हाः तयाः मण्डलीयागु ज्याय् तये मते, छायाधाःसा व मनू मभिम्ह जूसा वयागु पाप छन्त नं लाइ। थःत पापपाखें तापाक हे ति।

23 न्हापा थें लः जक त्वने मते। थःगु प्वाःयागु नितिं उसाँय् मदुगुया नितिं भचा भचा दाखमघ नं त्वनेगु या।

24 गुम्हय् गुम्हय्सिगु पाप ला बांलाक हे सी दयाच्वनी, इपिं न्हापा हे दोषी ठहरय् जुइ। गुलिसिगुं पाप ला लिपा लिपा जक सी दइ।

25 अथे हे गुलि गुलि भिगु ज्या ला न्हापा हे बांलाक सी दइ। अले सी मदुगुं नं लिपा सीदयावइ, त्वपुयातये फइ मखु।

6

दासतयत् अती बीगु

1 दासं थः मालिकयात हनाबना तयेमाः। अले जक परमेश्वरयागु नां व जिमिसं स्यनागु भिंगु खँयात क्वह्यांकाः खँ ल्हाये फइ मखु।

2 विश्वासी दाजुकिजा ला खः नि धकाः सुनानं थः विश्वासी मालिकयात हनाबना मतयेगु याये मते, बरु इमिगु बांलाक सेवा या। छायाधाःसा इमित भिनिगु थः हे दाजुकिजायात भिनिगु खः। थ्व हे खँ छं मेपिन्त नं स्यनेकने या।

धिबायागु लोभ

3 सुनानं मेकथं स्यनेकने याना जुल, अले झी प्रभु येशू ख्रीष्टयागु सत्यगु वचन व झीसं परमेश्वरयात मानय् यायेमाःगु खँ मन्यन धाःसा

4 वं छुं हे मसीकं तःधंछुया जुइ। अले म्वाःमदुगु खँ पिकयाः जवाःसवाः यानाः ल्वापुथया जुइ। थुकि मनूतयत् ल्वाकेगु, नुगः मुइकेगु, मेपिन्त मभिका जुइगु व म्वाःमदुगु संका जक याकी।

5 थुमिसं न्ह्याबले ल्वापु जक थया जुइ, थुमिगु न्ह्यपु हे खतं नयेधुंकल, थुमिके सत्य धयागु हे मदु। थुमिसं धर्म हे धिबा कमय् यायेगु लँपु खः धकाः धयाजुइ।

6 खः, दुगुलिं लुधकाः परमेश्वरयात मानय् यानाः च्वनेगु हे तःमि जुइगु खः।

7 बूबलय् नं झीसं थ्व संसारय् छुं ज्वना वयागु मदु। अले सीबलय् नं छुं ज्वनावने फइ मखु।

8 नयेत व पुनेत जक दुसा ला झीत गा हे गात नि।

9 तःमि जुइत स्वइम्ह मनू पापयागु ल्हातय् लाइ, वं मभिगु व थःत हे स्यंकीगु खँ मनंतुना जुइ। थुकि हे यानाः व नाश जुइ।

10 फुक्क मभिगु व बांमलाःगु ज्याया हा हे धिबायागु माया खः। गुलिखय् मनूतयसं धिबायागु लोभय् लानाः विश्वास यायेगु हे त्वःताब्यूगु दु। उकिं सह याये मफयेक दुःखकष्ट जुयाः नुगः हीका च्वनेमाली।

11 अय् तिमोथी, परमेश्वरया मनू, छ थज्याःगु मभिगु खं तापाक च्वनाच्चँ। परमेश्वरया न्ह्याःने धर्मी ठहरय् जुइगु, वय्कःयात मानय् यानाच्चनेगु व भिंमह जुयाच्चनेगु खँय् मन बिया चँ।

12 विश्वासयागु लँपुइ न्ह्यज्याना तुं चँ। अले अनन्त जीवन कायत् स्व। थुकियागु निम्ति हे परमेश्वरं छन्त सःतादीगु खः, अले थुकियागु निम्ति हे छं यक्व मनूतयत् थःगु विश्वासयागु साक्षी ब्यूगु खः।

13 फुक्कसितं म्वाका तःमह परमेश्वरयागु न्ह्यःने व पन्तियस पिलातसयागु न्ह्यःने सत्ययागु निंति नवानादीम्ह ख्रीष्ट येशूयागु न्ह्यःने जिं छन्त धयाच्चना —☆

14 झी प्रभु येशू ख्रीष्ट मझातले छं जिं धया थें बांलाक व सुनानं धाये ल्हाये थाय् मदयक याना च्वाँ।

15 परमेश्वरं वय्कःयात पाय्छि इलय् छवयाहयादी। परमेश्वर हे दक्वसिबय् तःधंम्ह, फुक्क शक्तिया थुवाः, जुजुतय् नं जुजु, अले प्रभुतय् नं प्रभु खः।

16 वय्कः न्ह्याबलें दयाच्चनीम्ह, सुं हे वने फइ मखुगु जलय् च्वनीम्ह खः। वय्कःयात आः तक सुनानं खंगु मदुनि, अले खनी नं मखु। सदां दयाच्चनीगु शक्ति वय्कःयाके हे दयाच्चनेमा, अले वय्कः न्ह्याबलें तःधनेमा। आमेन।

17 थ्व संसारय् च्वंपिं तःमि धाय्का च्वंपिन्त अप्वः तःधंछुया जुइ मते धकाः धयाब्यु। इमिगु धनसम्पत्ति सदां दयाच्चनी मखु। उकिं इमित धनसम्पत्तिइ मखु, बरु झीत फुक्कं बियादीम्ह परमेश्वरयाके भरोसा तया च्वाँ धकाः धयाब्यु।

18 भिंगु ज्या यायेगु, भिंगु ज्याय् तःमि जुइगु व नुगः चक्कंकाः मेपिन्त ग्वाहालि यायेगु या धकाः इमित धयाब्यु।

19 थुकथं इमिसं लिपायात स्यल्लाःगु धनसम्पत्ति मुंके फइ, अले धात्थेंगु जीवन कायेखनी।

20 तिमोथी, छु छन्त लःल्हाना बियातःगु खः व बांलाक बिचाः याना ति। संसारयागु म्वाःमदुगु खँपाखें व गुलिखय् मनूतयसं “ज्ञान” धकाः धयातःगु मखुगु खँपाखें तापाक हे च्वाँ।

21 छाय्धाःसा गुलिसिनं ला थज्याःगु खँय् जुयाः विश्वासयागु लँ हे त्वफिका छवःगु दु।

परमेश्वरं छिमित दया माया यानादीमा।

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 16 May 2025 from source files
dated 17 May 2025

838cc630-4ccf-5055-be45-10a98a141cc7